

Ed.

36. Frumvarp

til laga um einkasölu ríkisins á tóbaki og eldspýtum.

Flutningsm.: Jón Baldvinsson og Erlingur Friðjónsson.

1. gr.

Frá 1. jan. 1932 má enginn nema ríkisstjórnin flytja hingað frá útlöndum nokkra tegund af eldspýtum né tóbaki, hvort sem það er unnið eða óunnið og til hvers sem það er ætlað.

Lög þessi taka eigi til skipa, sem koma í landhelgi og hafa innanborðs eldspýtur eða tóbak, ef birgðirnar eru eigi að álitu tollstjóra meiri ensvo, að hæfilegur forði sé handa skipverjum og farþegum. Ef birgðirnar teljast meiri, fer um það, sem umfram er, eftir 13. gr. Þegar sérstakar ástæður mæla með, getur ráðherra látið sektir falla niður, og er heimilt að greiða verð fyrir eldspýturnar og tóbakið, ef ætla má, að tilætlunin hafi eigi verið að flytja það í land.

2. gr.

Tóbak það og eldspýtur, sem ríkisstjórnin flytur inn samkv. 1. gr., selur hún kaupfélögum, öðrum verzlunarfélögum eða kaupmönnum, en eigi öðrum. Ríkisstjórnin setur reglur um verzlunina.

3. gr.

Það fé, sem þarf til verzlunarrekstrar þess, er ræðir um í 1. og 2. gr., leggur ríkissjóður fram, og er ríkisstjórninni heimilt að taka það að láni.

4. gr.

Nafn verzlunarinnar skal vera „Tóbakseinkasala ríkisins“.

5. gr.

Ríkisstjórnin annast rekstur tóbakseinkasölnunnar, skipar forstöðumann og tvo endurskoðendur og setur þeim erindisbréf.

6. gr.

Ríkisstjórnin ákveður i reglugerð, hvernig fara skuli með eldspýtna- og tóbaksbirgðir þær, sem fyrir hendi kunna að vera í landinu 1. janúar 1932, og hvort gjald skuli greitt af þeim í ríkissjóð. Eftir 1. sept. 1931 skal ríkisstjórninni vera heimilt að banna allan innflutning eldspýtna og tóbaks, nema sérstakt leyfi hennar komi til.

7. gr.

Heimilt skal ríkisstjórninni að ákveða i reglugerð, að fyrirmæli laga 16. nóv. 1907 um tollvöruheymslu og tollgreiðslufrest skuli að því er allskonar tóbak snertir falla úr gildi frá 1. sept. 1931, og getur ríkisstjórnin þá krafizt tafarlausrar greiðslu á öllum ógreiddum tolli af tóbaki, er þá kann að vera i tollgeymslu.

8. gr.

Tóbakseinkasalan skal leggja frá 10 til 75 af hundraði á tóbak og 50 til 100 af hundraði á eldspýtur, eftir því sem henta þykir fyrir hverja tegund. Álagning þessa skal miða við verð vörunnar kominnar i hús hér á landi, án tolls. Tóbak til sauðfjárbaðana selst án hagnaðar.

9. gr.

Tóbakseinkasalan skal greiða hinn lögakveðna toll þar, sem vörunnar eru fyrst fluttar i land, á þann hátt og á þeim tíma, sem lög mæla fyrir. En heimilt skal þó ríkisstjórninni að ákveða i reglugerð, að reikningar tollstjóra á hverjum stað skuli greiðast beint i ríkissjóð og að greiðslurnar megi fara fram á ákveðnum tímum, t. d. mánaðarlega eða ársfjórðungslega.

10. gr.

Ágóði sá, sem verður af rekstri tóbakseinkasölnunnar, greiðist i ríkissjóð og telst með tekjum hans. Ríkisstjórnin setur nánari reglur um reikningsskil. Í þeim reglum skal ákveða, að árlega leggist nokkur hluti ágóðans i veltufjár- og varasjóð.

11. gr.

Tóbakseinkasalan skal jafnan hafa nokkurn forða af eldspýtum og tóbaki fyrirbyggjandi i Reykjavík. Kostnað af vörusendingum innanlands greiði viðskiptamenn. Þantað tóbak og eldspýtur getur tóbakseinkasalan látið senda beint frá útlöndum til þeirra staða hér á landi, sem óskað er, og miðast álagning þá við verðið á höfn ákvörðunarstaðar.

12. gr.

Ríkisstjórnin ákveður hámarksverð tóbaks og eldspýtna i smásölu.

13. gr.

Umbúðir allra eldspýtna- og tóbakstegunda, sem tóbakseinkasalan flytur inn, annara en tóbaks til sauðfjárlækninga, skulu vera merktar með álimdum miðum, er á sé letrað „Tóbakseinkasala ríkisins“.

14. gr.

Brót gegn lögum þessum varða sektum, allt frá 50 til 20000 kr., ef eigi liggur þyngri refsing við eftir öðrum lögum. Auk þess skal tóbak og eldspýtur, sem inn er flutt í heimildarleysi, gert upptækt og afhendist tóbakseinkasölnni til ráðstöfunar. Andvirðið telst meðal tekna hennar og rennur í ríkissjóð.

15. gr.

Með mál út af brotum gegn lögum þessum skal fara sem almenn lögreglumál.

Greinargerð.

Frumvarp til laga um tóbakseinkasölu hefir verið flutt á undanförunum þingum, og tekjur ríkissjóðs af einkasölnni verið áætlaðar liðlega 200 þús. krónur. Frv. þetta er samhljóða frv. því, er borið var fram í fyrra, að öðru en því, að hér er lagt til, að Tóbakseinkasalan fái jafnframt einkarétt til að flytja inn og selja eldspýtur. Má vænta af því nokkurs tekjuauka fyrir ríkissjóð, svo að óhætt mun að áætla tekjur ríkissjóðs af einkasölnni, ef frv. er samþykkt, um 250 þús. kr., og er þá hægt, að öðru óbreyttu, að lækka nauðsynjavörutollana um þá upphæð.